

Pus ma lhit'alatayalhcha an lobj ma ixmxtuputun an jas'at'a borrego, pero ma ntu lay maxtulh, pus ma ancho'olhcha.

Walh ma lanan pants'ik'is jumpalh, ma chilhcha an xanati borrego ma najun:


—Ikchincho'olhcha kints'alh, ¿t'anumat'i?

Pus an jas'at'a borrego ma najun:

—Li k'at'ach'annuch'it'a.

Walh ma la'ts'in an jas'at'a borrego li ma yucha sawalhi ixnati, pus ma malhti'anilhcha.

Wachuncha, ma ntu lay xamati ix'o'xcho'oy. Masi an lobj ma sawalhcha xlipuxkawniy ma ntu lay x'o'xcho'oy nin an coyotej u tumpaj ma'tili', mu anchunu jas'at'a borrego ma sawalh xjalakpastaknan.



La'atam wilhchan an xanati borrego ma lhitsukulh xas'at'a. Ma sawalhcha s'alalhi walh akxni ma palaycha ta'ayalh chi ma sawalhcha k'usi xjunita anchunu jas'at'a borrego. Ma sawalh ixja'asmatnan, pus ma ntu k'is ixt'atalhanankani ixmakawkan wa ix'akstu. Mu li ma xjuncan li ntu kataxtuya, ma ntu ixtaxtuy.

Walh ma chilh la'atam wilhchan akxni ma juncan an jas'at'a borrego:

—Ik'ti'ancha laktamawna yu ka'uyaw. K'a sa'ch'a t'a'ulh. Oxicha akmalaklhchawya', li xamati kamina jant'u k'at'imat'i'anin. Kit'in akxni akchincho'oya akmasuniyan ani kinch'aja'. Aniya




akputach'annutachilh an tan tantulho'o'o junita ani laka cha'a'. Li xamati kalakapusaya an malhticha chi li ntu masuniyani an xch'aja, jant'u k'at'imalht'i'anin. Oxicha k'ala'ts'i tacha tasuy an kinch'aja', para li ntu kata'o'xcho'on.

Wachuncha ma oxicha malaklhchawlh, ma alhcha an xanati borrejoj.

Walh an lobj ma la'ts'ini akxni ma alh an xanati borrejoj, pus ma najun:

—Chaway ak'ana o'xcho'onu an jas'at'a borrejoj.

Walh ma pants'ik'ischa walh ma cha'alhcha an lobj an tan tanun an jas'at'a borrejoj, ma lakapusaycha an malhticha. Pus ma najuncha an jas'at'a borrejoj:



—¿Tisu uxint'icha?

Pus an lobj ma najun:

—Kit'ini minati. Ak'imalht'i'anin mu chaway ikchincho'olhcha.

Pus an jas'at'a borrejoj ma najun:

—Pus k'at'amaknuch'ita an minch'aja', akla'ts'ina li uxint'iy kinatik'at'i sawalh.

Pus an lobj ma tamaknulhcha an ixch'aja', chi an jas'at'a borrejoj ma la'ts'ilhi li ma ntu yu sawalhi an xnati, pus ma juni:

—Uxint'i jantu kinatik'at'i sawalh. Mu ntu chuni ch'an'unit'a tacha an ch'anjunita an kinati. Uxint'i wa k'i'o'xch'o'op'ut'uncha.